

**Umiarsualivimmieinnermut akileraarutit pillugit Inatsisartut inatsisaata
allanngortinnerra pillugu Inatsisartut inatsissaannut siunnersuut (Umiarsuarni
takornarianik angallassisuni ilaasut akileraarutaannik atuutilersitseqqinnej)
Aningaasaqarnermut Akileraartarnermullu Naalakkersuisumit saqqummiunneqartoq**

pillugu

Aningaasaqarnermut Akileraartarnermullu Ataatsimiititaliap

siunnersuutip aappassaaneerneqarneranut

ISUMALIUTISSISSLUTAA

Aningaasaqarnermut Akileraartarnermullu Ataatsimiititaliap suliarinninnermini kingullermik ilaa sortarai:

Inatsisartunut ilaasortaq Asii Chemnitz Narup, Inuit Ataqatigiit, siulittaasoq
Inatsisartunut ilaasortaq Jens Frederik Nielsen, Demokraatit, siulittaasup tullia
Inatsisartunut ilaasortaq Peter Olsen, Inuit Ataqatigiit
Inatsisartunut ilaasortaq Mariia Simonsen, Inuit Ataqatigiit
Inatsisartunut ilaasortaq Kuno Fencker, Siumut
Inatsisartunut ilaasortaq Karl Tobiassen, Siumut
Inatsisartunut ilaasortaq Jens Napaattooq, Naleraq, Knud Mathiassenimut sinniisoq, Attaviitsoq

UKA 2023-mi ulloq 3. oktober 2023 siullermeerrinninnerup kingorna ataatsimiititaliap sunner-
suut misissorpa.

1. Siunnersuutip imarisaa siunertaalu

2023-mut aningaasanut inatsit pillugu isumaqatigiissummut atatillugu siunnersuut saqqumiunneqarpoq, tamatumani umiarsuarni takornarianik angallassisuni ilaasut akileraarutaannik atuutilersitseqqinissaq partit isumaqatigiissutigimmassuk. Umiarsuarni takornarianik angallassisuni ilaasut akileraarutaat umiarsuit Kalaallit Nunaanni umiarsualivimmut tulannerit umiarsualiviilluunniit avataanni kisarnerit tamaasa umiarsuarmi ilaasut amerlassusiat tunngavigalugit akilerneqartassasoq siunnersuutikkut matumuunakkut peqqussutigineqarpoq. Taa-
maalillunilu siunnersuut ilaasunut siusinnerusukkut akitsuutigitinneqartumut, umiarsuarmik takornariartaammut ilaasunut ataatsimoortumik akitsuutaasumut, sanilliulluni allaaneruvoq. Tamatuma saniatigut siunnersuutigineqarpoq umiarsuit takornariartaatit angisuut umiarsualivimmieinnerminni akitsuutaat (SIKUKI Nuuk Harbour A/S minillugu) marloriaa-

tinngortinneqassasoq aammalu avatangiisirut aserfallatsaaliuinermullu akitsuummik nutaamik kommuninut tuttussamik eqquissisoqassasoq.

2. Siunnersuutip Inatsisartunit siullermeerneqarnera

Siullermeerinninnermi annertuumik oqallitoqaraluartoq siunnersuut nalinginnaasumik taper-serneqarpoq. Oqallinneq ilaatigut akitsuutip sumut atorneqarnissaanut tunngatillugu suut pingaarnersiorneqarnissaannut kiisalu qanoq annertussuseqarnissaanut tunngavoq. Tamannalu tunngavigalugu siunnersuut Aningaasaqarnermut Akileraartarnermullu Ataatsimiititaliamit suliarineqartussanngorlugu innersuunneqarpoq.

3. Tusarniaanermut akissutit

Tusarniaanermut akissutit inatsisisatut siunnersummut ilanngunneqarsimapput, tamannalu Inatsisartut Siulittaasoqarfiata ilusiliinissamut piumasaqaataanut naapertuuppoq. Tassani allassimavooq siunnersuut piffissami 2023-mi 1. junimit 29. junimut tusarniaassutigineqar-simasoq. Tusarniaanermut akissutit tiguneqartut siunnersummut nassuaatini allaaserine-qarput.

4. Saaffiginnissutit

Ulloq 25. september ataatsimiititaliaq siunnersummut tunngatillugu AECO-mit (Association of Arctic Expedition Cruise Operators) saaffiginnissummit tigusaqarpoq. Saaffiginnissut isumaliutissiisummut **ilanngussatut** ilanngunneqarpoq.

5. Aningaasaqarnermut Akileraartarnermullu Naalakkersuisup ilisimatitsiffiusumik ataatsimeeqatiginera

Siunnersuutit ataatsimiititaliamut aammalu Naalakkersuisut suliassaqarfiinut ataatsimut attuumassuteqartut pillugit Aningaasaqarnermut Akileraartarnermullu Naalakkersuisoq ataatsimiititaliamit ilisimatitsiffiusumik ataatsimeeqatigineqarpoq. Siunnersuutit taakku ilusili-gaanerannik saqqummiussinermi siunnersuut matumani pineqartoq ilaavoq.

6. Siunersiuineq

Ataatsimiititaliap siunnersummit suliariinninnerani atugassatut kisitsisitigut paasissutissat Aningaasaqarnermut Akileraartarnermullu Naalakkersuisumut ataatsimiititaliamit ujartorneqarput. Ataatsimiititaliap allagaa aammalu Aningaasaqarnermut Akileraartarnermullu Naalakkersuisup akissutaa isumaliutissiisummut matumunnga ilanngussatut ilanngunneqarput.

7. Siunnersuutip aappassaaneerneqarneranut Naalakkersuisut allannguutissatut siunnersuutaat

Siunnersuutip aappassaaneerneqarneranut Naalakkersuisut allannguutissatut siunnersuutaat ulloq 18. oktober tiguneqarpoq. Allannguutissatut siunnersummut nalinginnaasumik nassuaatini Naalakkersuisut nassuaatigaat, allannguutissatut siunnersuutip siunertarigaa inatsi-

siliornerup erseqqinnerulersinneqarnissaa akileraaruseriffimmut inatsimmi tunngavissamik immikkut ilanngussinikkut.

8. Ataatsimiititaliap siunnersuummik suliarinninna

Umiarsuarnut takornariartaatinut ilaasunut akitsuutip atuutilerseqqinnejarnissaanik siunner-suut nalinginnaasumik taperserneqartoq ataatsimiititaliamit maluginiarneqarpoq.

Kommunit avatangiisirut aserfallatsaaliuinermullu akiliisitsinissamut periarfissinneqarnerat ataatsimiititaliamit pitsasutut isigineqarpoq. Tamatumanili akitsuummik allaffissornikkut aqutsinerup kommuninut pisariaqanngitsumik artukkersuutaannginnissaa isiginiarneqassaaq.

Umiarsuarnik takornariartaatinik takornariarnerup takornariariaatsinit allanit allaanerunera ataatsimiititaliap suliarinninnermini pingaartissimavaa, tassami taakkunanng angalasut nunami unnuinernik nerisaqarnernilluunniit taama annertutigisumik atuineq ajormata. Taamaattumillu umiarsuarnik takornariartaatinik takornariat nunamiinnerminni akitsuuserneqarnerat piissusissamisoortutut ataatsimiititaliamit isigineqarpoq. Tamatuma saniatigut sumiiffinnik attuumassutilinnik kommunit namminneq toqqaasarnissaat aammalu aserfallatsaaliinermut tunngatillugu akiliutissamik aalajangersaasarnissaat naapertuuttutut ataatsimiititaliamit isigineqarpoq.

Takornariaqarnerup imminut napatinissaata pingaaruteqarnera, tassungalu ilanngullugu avatangiisit najukkanilu piniariarfiiit umiarsuit takornariartaatit najuunnerannik sunnerneqanngitsut, partiinit arlalinnit erseqqissaatigineqarmat ataatsimiititaliamit maluginiarneqarpoq. Tassunga atatillugu siullermeerinninneq ataatsimiititaliamit innersuussutigineqassaaq, tamatumani ikummatissat kinertut (heavy fuel oil) atorunnaarsikkiartuaarneqarsinnaanerannik partiit arlallit kissaataat tusaatissatut tiguneqartoq Aningaasaqarnermut Akileraartarnermullu Naalakkersuisup naggasiinermi oqaatigaa.

Kiisalu ataatsimiititaliap paasinninna malillugu umiarsuarnut takornariartaatinut ilaasunut akitsusiineq takornariallu amerlanerunissaannik kissaateqarneq oqimaaqtigiissinneqassapput, tamatumalu peqatigisaanik avatangiisit kiisalu najukkani najugaqartut inuussutissarsiortullu isiginiarneqassallutik.

Tamanna tunngavigalugu umiarsuarnut takornariartaatinut ilaasunut akitsuutip ingerlaavartumik iluarsiissuteqarfigineqartarnissaanik Naalakkersuisut peqquneqarsinnaanerannut periarfissaq, taamaalillunilu ingerlataqarfimmieq ineriantorneq malillugu akitsuutinik eqaannerusumik naleqqussaasinnaanerup anguneqarsinnaaneranut periarfissaq, ataatsimiititaliamit oqaluuse-rineqarpoq. Tassunga atillugu taamatut ingerlaavartumik eqaannerusumillu iluarsiissuteqartarneq qanoq pisinnaanersoq Naalakkersuisut aappassaaneerinninnissamut akissuteqaammini isummerfigissagaat ataatsimiititaliamit kissaatigineqarpoq.

Tamatuma peqatigisaanik umiarsuarnut takornariartaatinut ilaasut akileraarutaannik inatsimmi aalajangersakkap ingerlaavartumik eqaannerusumillu allanngortinnejarnissaaneranik qulak-

keerinnittumik siunnersuutip pingajussaaneerneqarnissaanut allannguutissatut siunnersummik saqqummiusseqqullugit Naalakkersuisut ataatsimiitaliamit kaammattorneqassapput. Taman-na pisinnaavoq umiarsuarnut takornariartaatinut ilaasunut akitsuutigitinneqartup allangortinneqarnissaanik aningaasanut inatsisini ukiumoortuni Naalakkersuisut siunnersuuteqarnissamut periarfissinneqarnerisigut.

9. Siunnersuutip aningaasaqarnikkut kingunerisassai

Siunnersuutip piviusunngortinneqarnerani aningaasatigut kingunerisassat siunnersummumt nalinginnaasumik nassuaatini allaaserineqarput. Ataatsimiitaliaq tamatumunnga annertunerusumik oqaaseqaatissaqanngilaq.

10. Ataatsimiitaliap inassuteqaatai

Tamanna tunngavigalugu allannguutissatut siunnersuut **akuerineqassasoq ataatsimiitaliap isumaqatigiittup** inassutigaa.

Taama oqaaseqarluni isumaliutissiisummilu allassimasutut paasinnilluni ataatsimiititaliap siunnersuut aappassaaniigassangortippaa.

Asii Chemnitz Narup
Siulittaasoq

Jens-Frederik Nielsen

Peter Olsen

Mariia Simonsen

Kuno Fencker

Karl Tobiassen

Jens Napaattooq